

ONCIDIUM. SW. REF. R. BROWN.

Hort. Kew. 5. p. 215. *Act. Holm.* 1800. p. 239. t. 3.

Calycis foliola 5 subaequalia, patentia. Labellum ecalcaratum basi cristatum. Gynostemum apice alatum. Anthera terminalis, decidua. Pollinis massae 2 cereaceae.

I. ONCIDIUM emarginatum. nob.

O. foliis lanceolato-linearibus obtusis emarginatis; floribus terminalibus, labello obovato integerrimo, gynostemialibus ovato-subrotundis.

In arboribus plantationis *Hof van Holland*.

Perennis. Floret Septembri.

Descript. Parasitica. Radices simplices, teretes, flexuosae, glabrae, albae. Caules adscendentes, spithamei, simplices, sulcati, foliosi, inferne vaginis foliorum marcidis vestiti. Folia alterna, disticha, patentia, coriacea, lanceolato-linearia, pollices 2 — 2½ longa, obtusa, emarginata, integerrima, plana, lineata, glaberrima. Vaginae caulem arcte amplectentes, membranaceae, striatae. Flores pauci terminales, pedunculati, purpurei, punctis argenteis notati. Pedunculi unciales, curvati, teretes, leviter incrassati, glabri. Bractee ad basin pedunculorum subduae, parvae, alternae, ovatae, acutae, concavae, striatae. Calyx patens, glaberrimus, nervoso-venosus: foliola 3 exteriora oblongo-lanceolata, acuminata, inferiora 2 paululum breviora, oblonga, acuta. Labellum obovatum, basi attenuatum, integerrimum, planum, supra tuberculis rugaeformibus notatum. Gynostemum breve, apice alis 2 parvis, patienti-erectis, ovato-subrotundis instructum. Capsulam non vidimus.

Observ. Genus *Jonopsis* HUMB. et KUNTH. *Nov. gen.* 1. p. 348. ab *Oncidio* a quo foliolis calycinis exterioribus lateralibus basi connatis calcar referentibus differre dicitur, vix diversum habendum est. In pluribus *Oncidii* speciebus calycis foliola exteriora leviter connata sunt; et *gibber minutum* hac conjunctione ortum — talem et vix calcar sistit icon — pro caractere generico, ut nostra opinio fert, haud sufficiat.